

雲間據目抄卷之四

華亭叔子范濂識

記賦役

賦役兩端東南重務非特國計所關而民俗之存亡隆替皆由於此蒞茲土者撫按有司苟留心民事何嘗不首談賦役哉但賦日議薄而卒不薄役日議輕而卒不輕故積久成疲凋瘵已極有識者且未卜所稅駕矣今國家南北交兵當事者莫可誰何有督逋加稅之令急於星火此昌黎氏所謂民就窮而斂愈急可勝慨哉予記賦役也蓋叙吾松因革大畧而附狂瞽之見亦竊有望于志士仁人之採擇云爾

松之田賦自宋端平元年華亭令楊瑾行徑界法其籍自畝之圍則有歸圍簿自圍之保則有歸保簿自保之鄉則有歸鄉簿自鄉

之縣則有都頭簿田不出圍稅不過鄉版簿甚明賦稅就實足稱良法美意矣使令皆如其人此法至今存可也元入中國定天下田稅上田每畝三升中田二升五合下田二升水田五升此以貌道治天下賦雖輕不足法也至張士誠據吳而蘇松之版籍蕩搖盡矣國初籍沒土豪田租有因張氏義兵而籍入者有因虐民得罪而籍入者有司概以租額起糧每畝四五斗七八斗至一石以上者且以私租爲官糧不便輸納遂有二三石納一石四五石納一石者故洪武受命天下咸稱得所而蘇松獨流移載道良有以也至宣德五年周文襄公忱巡撫江南有杜宗桓上均額之說甚詳甚善公竟不行顧文僖謂此公必有深意蓋時方減稅復議均糧其勢難並行也已而文襄疏請得減松郡稅糧三十萬二千八百八十五石有奇又請極重官田極貧下戶並從輕折每金花銀

一兩准平米四石闊白布一疋准米一石算銀三錢三梭布一疋准米二石算銀六錢計該府共得輕折米四十八萬二千六百八十七石有奇夫小民既蒙減額又獲輕賚其恩渥矣東南雖百世尸祝公豈爲過哉行之既久所謂極重官田極貧下戶遂倒置于吏胥奸宄而輕折高下之弊不可窮詰嘉靖間歐陽巡撫括該府額賦一則派徵每平米一石准銀四錢凡本折悉照此例始得一洗前弊而耗亦從此大減矣行之既久則產去粮存之弊因之紛起隆慶三年生員張丙蘊建爲清丈均糧之說請于當事者當事者是其議請于朝乃簡命僉事鄭元韶董其役元韶卽本府同知也于是廣詢輿論分上中下三鄉以定斗則華亭每畝科正米二斗四升五合上鄉加耗一斗二升中鄉七升五合下鄉三升護塘外者免上海每畝科正米二斗二升五合上鄉加耗一斗中鄉六

升下鄉三升護塘外者免其各最低薄者或二畝三畝方折一畝有五畝七畝折一畝者若青浦分自二縣者田則科則悉仍其舊于是共計平米一百二十三萬八千六百餘石內增灶蕩米二萬二千六百餘石緣民灶相參易生影射故概丈概徵以杜弊端民間遂稱公平矣但近海之田以其斥鹵瘠薄兼時有風濤飄決故另議每石折銀四錢計平米八千一百六十九石五斗有奇又去海稍遠者每石折銀五錢計平米一萬一千三百六十九石有奇餘皆腹以內田土一例五錢算徵本折並派而東鄉三十六七保等區又以瘠薄援例告折者有司概徇民情輕折四錢計平米一萬石有奇則于起運存留之數不無太損于是以田之甲者移之乙而民間又有增賦之議矣矧時久弊生征斂無法則上官之詭寄吏胥之挪移圖書之飛洒奸宄之侵匿其患又有不可勝言者

萬曆十七年巡撫周至留心剔蠹設爲經賦二冊合用會計凡例共二十八條如檄李兵道又可謂曲盡人情故一時奸胥賴以稍輯而有司徵比庶幾可規獨詭寄一端惜其不能併去至今二十年寧夏之變朝鮮之警上嚴旨令開府督逋爲備兵計于是巡撫劉公以遞年書冊清查刻日嚴追完納且遣對聯令有司懸之迎賓館云力田以給公上庶民且然積穀以肥私家吾輩何忍松之士民始有變產輸官者而向來影射侵漁之弊又爲之一洗矣夫以諸公皆經世之才而留心于東南之一賦其規畫調停委曲周密可不謂無遺策也哉卽通達如賈生安所置喙也然以予觀之文襄上矣歐陽次之如周如劉僅可謂之救弊而未可謂之仁也大抵詳于法者法雖工而適以困民之力久之且有法外之遺奸仁以濟法者則裕乎民而因以得民之心久之且貽國祚之永福

嘗觀正德六年巡撫張鳳議復文襄折徵舊例時華上耆民嚴泰朱裡等指陳利弊盛稱文襄而歸罪于華亭之董令末云老民不知先年何故金花銀准米四石布疋准米二石一石却乃錢糧反多今者金花銀不過一石九斗白銀不過一石七斗不知錢糧何故反少此其言卽任仁任法之驗可考而鏡也今松之民凋瘵極矣水旱頻仍饑饉薦至號稱殷富者以供輸供役而十室九墟策名縉紳者以尙侈尙奢而虎皮羊質譬之善病之夫耳目口鼻非不猶然人也而膚體血脈銷鑠幾盡蓋惴惴焉不能畢其命矣大司農猶指東南爲奇貨日以誅求督撫督撫日以誅求司牧司牧者下其令于里役稍不從命鞭笞備至小民則售子鬻妻罄家蕩產巨室則賣絲糶穀剝肉醫瘡幸國計稍充當事囂囂然自爲得計曰我能爲朝廷足國用矣我能爲民間驅積蠹矣我能爲東南

征積逋矣有人心者固如是乎故予叙三縣稅額而贅以裕民七議

華亭縣額徵平米五十九萬五千九百三十三石八斗有奇除護塘外平米八千一百六十九石五斗零每石折銀四錢仍作本色又有改折平米八萬九千三百四十八石八斗零止納折銀四萬二千八百七十三兩八錢五分有奇抵作起運實該驗派本折二色平米四十九萬八千四百一十四石四斗有奇

上海縣額徵平米三十九萬一千二百二十三石四斗五升零除改折平米四萬六千九百一十三石四斗有奇止納折銀三萬二千五百二十一兩八錢六分零抵作起運實該驗派本折二色平米三十四萬四千一百九石有奇

青浦縣額徵平米二十二萬八千九十石五斗零除改折平米四

萬一千四百五十九石二斗有奇止納折銀一萬九千九百六兩六錢九分零抵作起運實該驗派本折二色平米一十八萬六千六百三十一石三斗有奇

一議五等之均 賦稅之法鄭僉憲以三等起科是矣而上中下三鄉殊爲未當如西鄉稱上乃有一畝僅租五六斗或八九斗一遇旱潦輒無粒者概目爲上而重斂之可乎南鄉稱下乃十一二保有一畝得糯米租一石二斗且旱潦無虞者概目爲下而薄收之可乎東北稱中乃僅種花荳青秧天稍亢旱民束手矣概目爲中而盈取可乎故予以松郡之田當列五等如城市係商賈輻輳民居稠密之地列爲上上西北皆膏腴列爲上西南爲中東南爲上中南北爲下如是而又精覈其低薄池蕩與新荒舊荒之別履畝而稅則輿情允愜民亦無亂於上供矣壬辰華亭項知縣擢戶

科給諫建議改折三十八保等荒區民皆誦德

一復折布之例 松民善織故布爲易辦而文襄以布代銀實萬世良法况今北邊每歲賞軍市虜合用布疋無慮數萬朝廷以帑藏赴督撫督撫以帑藏發邊官邊官以帑藏賚至松郡而牙行輩指爲奇貨置酒邀請邊官然後分領其銀貿易上海平湖希布染各樣顏色搪塞官府中間轉折虛費動以數千于國計更何益也合無撫按奏請合用賞邊布疋數目該用價銀若干聽兵部議定布式廣狹長短令三縣令頒示小民并隨時酌處其價務要公道使民樂輸民有欠金花自一錢起至一兩者聽其照式輸布或有合用三梭及可充本郡兵餉者亦如邊布頒式准收則上省無益之費下免難辦之苦前不失文襄之遺意後亦便有司之徵求未必非裕民足國之一助也

一議助額之方 松郡田賦至一百二十餘萬亦云極矣第可議減不可議增如郡治內城脚有軍營地飲馬池若干今皆爲有力者起建第宅則此地不屬之官屬於民而所謂營與地特虛名耳合無奏革虛名照則起稅而卽以其稅均入于一百二十餘萬之額又各鄉民每歲有新填池蕩開墾積荒通計十年可得百有餘頃謂之升科而卽以所升者均入于一百二十餘萬之額其或坍江坍泖苟可修復故道不妨動眾勞民萬一不可亦藉升科補之此雖萬分之一助而擬之加賦者則異矣

一停優免之例 每歲均徭例有優免而弊極多端如竈戶一丁例免該田二十四畝而貧竈無田甚多皆爲鹽場大戶花分濫免此弊之最著者也其他鄉宦舉監生員升降進退死生朝暮變態安能一一審覈毫無滲漏乎其間必有當免而不免與不當免而

免者祇爲奸胥出入之竇而已合應概縣減數徵派以杜弊端雖祖宗恩例君子當存愛禮存羊之心而俗所稱拯頭救脚之說亦今日權宜處置之一策也

一調額外之征 松賦正額民已不堪而額外又有均徭練兵開河織造貼役加耗種種不經難以枚舉則如上鄉三斗六升五合起科之田計有五斗之供矣况兼凶荒賠納其利安在而士民亦何樂于有田也然諸費斷不可少而民力漸不能支合無奏請于兩京雜費內如蓆板顏料芽茶彙筍及宗人府公侯駙馬公主供應等項量裁十分之二又于所屬地方徵門攤局鈔魚課匠板生儒吏胥援例銀兩及撫按有司贓罰酌量充補庶幾減一分則百姓受一分之惠矣此其說雖妨衆難行而得任事如文襄者未必非救弊之一助云

一嚴詭寄之弊 詭寄之妨賦有二其一自貧儒偶躡科第輒從縣大夫千請書冊包攬親戚門生故舊之田實其中如本名者僅一百畝浮至二千該白銀三百兩則令管數者曰督寄戶完納及有司比較結數二百七十兩已足九分便置不比是秀才一得出身即享用無白銀田二百畝矣積以十計則每縣無白銀田去二千矣况十不足盡乎又况所寄愈多所侵愈甚乎其二自鄉宦年久官尊則三族之田悉入書冊其間玩法子姪及妻族內親如俗所稱老婆舅之類輒謂有司無可奈何鄉宦而鄉宦又無可奈何我們于是動輒欺賴僅與管數人僱倩代杖遷延歲月而已故一官名下有欠白銀一千餘者夫一官以千計則十官以萬計矣况又不止十乎故祖宗爲詭寄立法恐隱漏大戶而不意今日之弊則有在此而不在彼者故嚴查之法須將各宦書冊每年自十月

立限至來年二月止撫臺先于二月以內弔取書冊府縣卽將管  
數人同冊解查其有完納無欠者着有司以禮旌異欠止二三百  
兩者卽將兩京應解錢糧起批着落管數人催取批廻限日繳報  
至五百兩以外者先將管數人坐贓問遣仍行嚴提本官子姪監  
追則彼此無樂于詭寄而弊可潛消矣

一定會計之則 糧數自丈清後雖有定額而每歲徵收則憑會  
計有一年米多而銀減者有一年米少而增銀者有一年銀米相  
埒者遂使奸貪吏胥得以挪移出入其間而輸納者亦不得據爲  
長例飢法莫甚于此合無以國家經費較數歲之中立定等則如  
三斗六升五合起科田歲輸一斗六升五合爲倉糧以二斗折銀  
爲金花餘中下二鄉亦以例推算卽遇凶荒或減米幾升減銀幾  
分令人曉然屈指可計此所謂賦有定法民有常供在上無會計  
之煩在下杜疑影之弊正合郡士民所稱快而何當事者不一念  
也豈其中有不容不計乎抑多首尾之畏故因襲而不肯振刷之  
乎豈儒所不曉也

記役 誌載唐宋以來役有立法互有同異惟楊瑾設爲義役又  
置役田以充其費盖合熙寧僱役元祐差役而變通之可謂百世  
稱善者本朝役東南之民皆從均徭編審而獨注意於糧長之一  
事故祖宗之法必取丁力相應有行止者充之其制亦未嘗不善  
也特以法久弊生時移事改或貪墨之吏務瘠民以肥家或奸詭  
之徒爭舞文以玩法故議裁議處其說紛紛而終鮮良策識者隱  
憂試以邇年因革之大畧言之吾松之重役有五一日庫子一日  
長收一日解戶一日公務一日收倉庫子有各庫不同而惟縣堂  
爲最蓋一縣雜費與迎送上官種種不經俱責成于庫子故歲用

四名每名費千金有餘至癸丑倭亂督撫不時按臨皆用庫子爲支應大戶而其役始濫觴充之者鮮不破家矣是役遂議革而以買辦鋪陳之類屬之庫吏然而縣之分費有必不可免者竟屬之長收長收者自海中丞用一條鞭法歲收兵白徭銀始終其役而名之者也長收雖屬收銀而其費與庫子相埒如各上司按臨例有迎風飯下馬飯閱操酒送風飯動以數金計而時值暑天隨腐隨易則一酒而費數金者有之其他種種雜差不可勝計兼之縣令賢否不同有需索常例火耗交際餽儀與一府各衙門吏書皂快指爲奇貨動輒干求有不如意即怒目嗔詈此其費幾二千金而華亭十二櫃每月輪值一名謂之當月是無庫子之名存十二庫子之實也至知縣楊東野雖號稱敏吏而承奉上官實爲超格時長收正屬監生顧正心正心又江南豪華公子也上官至責令

擺酒正心多方覓水陸奇珍百餘品而細菓如松杏蓮心瓜仁之屬裝綴若魚鱗高一尺有奇器皿壺盃皆用古窰金玉此規一立動費百金於是上官爭以楊令爲能以松江爲富麗而長收之役始濫觴矣自是正心令姜姓者議革而以總催充收銀之役謂之櫃收總催無大戶收銀不過二十兩支放一畢即令交代蓋取衆擎易舉之意也華亭每歲用一百名分列十櫃上青稍減此其役視長收較輕而火耗常例及衙門雜費猶故也每名計費銀三百兩而破產傾家者衆且以支應上司酒席不時弔取貲郎富室充之如庚寅按院學院同時按臨兩院有交請席府縣有公宴兩院席其一用監生顧正心其二用監生陳大廷其三用監生宋啓明各爭奇鬥品求媚有司時五月有肥紫蟹重斤餘者鮮鱒魚五六斤者餘品精美豐潔不可勝道宋備攢盒二具費銀三兩知府詹

公華亭項公皆按院同年也按院嘖嘖嘆賞曰兩年兄蒞茲土可不謂福人哉此風沿至于今日甚一日是去十二長收之名存百餘長收之實也于是民間共稱不便而建議者又紛然矣公務糧長在未清丈時每保用五名凡本保本區錢糧責令催辦輸納而以里排佐之自後包攬之奸出而欺蠹之弊生兼之歲無定額戶有積逋有以賠貼傾家者有以收侵坐法者有以積累亡身者其害不可殫述故鄭道均糧後遂議革於是以官戶之糧并之書冊以巨室之糧歸之囤戶而以十排年充催辦小民之役十排年者卽所謂里排司一里之事第一年爲總甲第二年爲該年第三年爲催辦第四年爲塘長又以甲首副之此乃祖宗定役不由均徭點差者今獨重辦錢糧第令從民間依期督促上倉納米赴櫃納銀而錢糧毫不經手亦取衆擎易舉之意且杜侵漁賠累之奸此

法終不可變者也然公務之弊在於侵漁而里排之弊在于容隱蓋十人同圖同產則以一人蔽九人而十人遞相爲蔽矣此不侵之侵也公務之患在包賠而里排之患在准折蓋圖中必有富民里排豈無假貸一或逋負則富民必藉口勒措而里排亦不敢吐氣矣此不賠之賠也且荒區荒圖編僉充數乃有家無擔石丁無餘口遂列于排年者旣殫力於催徵又奔命於赴比加以皂快之拘提歇家之酒食吏胥之恐喝所費多歧遂至賣田宅鬻男女流移遷轉不可窮詰近年常熟顧襟宇吳江孫質菴兩公建議大相水火然以予觀之則得失相半未可左此而右彼也當事者緣索糧長所由始又合武進縣每圖編僉之說廣其爲糧長間亦可謂究心民瘼者矣但解戶之役有細布有南北運有徐州鳳陽非不稱鉅乃所患者不過風波盜賊之險而其機每係乎天苟天不爲

災而益之以津貼之饒裕則奏績而保家者常十之九收倉之役有迎送監司有綱司話會有開倉修廩非不稱費乃所患者不過收貯出兌之煩而其機每係乎年苟年值其豐而佐之以明幹之有司則計日而成功者常十之十壬辰冬甘劉兩臺以軍兌先屬官戶次及囤戶倉收止備存留三倉其意雖省役省民而偏重宦家也難久試故此二役者第取家道殷實之人充之又得良吏調停其間則執役者有成議之可據不得逞奸以逃於法之外按役者有成規之可約不必飢法以徇乎下之情此役之無煩于深計者也獨櫃收催辦雖歷經議處旋弊旋革而時生隱患終乏遠圖恐良平持籌蘇張掉齒亦不能爲東南建萬世之利矣予不自揣敢以迂闊謬叅四議豈云有補於國是聊以備顧問於將來

一嚴里排之僉 里排者輪年僉役官無編審之煩挨甲奉公民

無扳累之苦誠經久可行之良法也但旣屬催辦則今日之里排卽昔年之公務矣若以貧窮無告之人濫充其役能保必無前弊乎故編審之年須取丁力相應者爲上以有丁無力有力無丁者爲朋名如本圖無人不妨通融計議或以客戶田多者充正役而以圖民之曉事者副之或取殷實之戶免其大役而分當幾甲則承役得人公輸自裕閭閻可無困苦逋逃而糧稅亦免侵漁拖欠此法雖千百世可行又何紛更之議乎

一清比較之法 徵限以十日爲期而限銀亦定數如第一限每圖限納白銀二十兩而辦或不等有浮于數之外者有如數者亦有納至十七八兩者有納一半者有僅止二三兩者多寡勤惰迥然矣乃比較之日一概赴比甚至鞭笞同用漫無差別不惟增役人一番盤費而奸頑藉爲口實遂令樂輸終事之民懈體而不前

此縣令昏逾之通弊也合于先期一日各排年將辦過銀兩數目開報區總如限二十兩納至十五兩者區總卽省發在圖催辦其不及者聽第名開數押齊候比而區總勤惰卽于比數內驗之如區轄三十圖而赴比仍三十人其罰卽與排殿者同科則賞罰旣明勸懲自著且民不擾而事不煩正司牧者所當留意也

一議官收之法 櫃收之役稱最不便者獨以在上有需索在下有干求在納戶有勒措耳愚意府縣設管糧官各一員正謂財賦之區欲令職專其事也今縣之管糧曰通判者日令分理詞訟僅供領運一差而於徵輸大務旣不可托亦無效用豈朝廷命官之意哉合無奏請如華上等壯縣管糧者須選鄉科清年有望之士蘇松等府管糧者須選甲科已試盤錯之賢責以專董錢糧分毫不令外與卽上司亦不得另有差委如十月初旬開倉則一應倉

務俱屬管糧衙料理及已經開櫃則以倉務歸之堂官擇一近縣衙門如鶴城書院之類移居本官選撥已經一考吏二名能寫老成書手四名隨侍堂設十櫃以東五櫃收官戶西五櫃收民戶俱許人戶自行投櫃每白銀一兩加耗銀四分以便傾銷吏書人等止許驗封登串發寫納戶銀兩數目不許別與分毫收至五日本官會同知縣并封貯庫以防盜賊之患其小民自分數起至四五錢者不必納櫃但照每限始日本官量給串票於各區總小民竟從區總交納仍索串票爲據至赴比之日區總并封投櫃卽持串票候本官照驗用過若干復量給串票若干以省騷擾府管糧廳許不時分巡各縣到倉閱糧到櫃閱收仍體訪官吏口碑遞送正堂填寫考語如有門役生事之人即便拿問每三限畢弔取官戶大戶書冊細驗納過數目有無多寡嚴行比較凡係糧稅詞訟悉

聽告理轉申正堂以杜濫受此法一立則需索干求勒捐之弊俱已潛消不惟可省收頭重役而國計亦賴考成且不虛設官之命實東南長策也但糧稅出入最易染指官雖擇人遷選能保終必得人須嚴行賞罰方示勸懲如官吏三年最績則吏准一考官擢不次其餘執事人役亦須厚其工食使得資生倘稍有覬覦更張即聽堂官指名參究問遣庶幾有志之士爭自濯磨不至卑卑無用如今日矣

一議供應之役 縣中雜費廉吏俱可裁省獨供應上司雖夷齊爲吏亦不能免若非委之大戶則一應酒席何從措辦合無一縣每年議取大戶十二名拈鬮分月專候上司按臨供役而所供者亦止設酒一事更無別差計各縣整年之內約有四月不免尙餘八人爲曠則于交歲時另議四名插入仍拈鬮值月以備來年夫雲間據目抄

一歲而僅役四人賠累既不爲多一役而僅供一酒其費亦不甚巨如是而民不稱便者未之有也若華上壯縣歲不乏一二人即以曠役者分委傾銷量亦不爲煩苦何當事者計不出此徒取曉曉之口稱冤哉

范叔子曰賦役之事余特記四十年以來因革損益之大端及予一人之淺衷薄識已耳其他挂一漏萬與經生擘畫之所不及者何可勝道也然以今之時勢論之賦之所望者在薄而今則不容不厚矣役之所望者在輕而今則不容不重矣厚不已則財盡重不已則力疲雖謂小東大東之詩即松民之詩奚不可哉撫養調停亦在上之人日留意焉耳不觀之馬牛乎始而責之耕十畝計耳責之走百里計耳終而日益之又從而鞭笞之馬牛雖賤其能堪乎司牧者等於馬牛奚忍哉余又詢吾松縉紳云四方郡縣賦

役自正額而外有司不得分毫有誅求如方衆甫在冀州夜集二三門生談文良久送出堂無燈火供應者絕不爲意而刺史亦不敢索索亦無有應者此微獨覘風俗之朴亦能養上人之廉其益非淺鮮也若吾松賦日厚而俗愈奢華役日重而供益謹飭故臨蒞茲土者但覺富庶之邦而不知膏血之暗抽也征求需索者但覺意欲之適而不知民生之日蹙也獻納貢輸者但求免禍謫之及而不顧身家之敗亡也姑舉一細事而論如御史按臨有下馬飯閱操酒縣令先定大戶充役每席用嘉餚四十味糖食四十味菓品四十味而攢盒煖盞之類無算一遇暑天不時更易動費百金而其間置辦物料憂其難精應對侍使憂其或忤縣令稽查憂其苛責皂快恐喝憂其無厭惴惴焉如臨深履薄不能畢命乃上官至僅供一餐之資而已倘得清介如海中丞者惕然思曰吾何

以飲食之故勞民動衆若此即嚴行裁革未必非地方一助也況由此例推之苟不便于民者悉從節省其爲小補又當何如譬之貧病之夫雖乏膳脩藥餌恣其安享而本原之地不加戕賊縱不能躋之仁壽獨不可苟延性命於旦夕乎嗟嗟論而至是悲矣悲矣余本山澤之臞無用於世即舉松郡而陸沉之亦何損於不肖乃曉曉爲賦役侈口者顧生於斯長於斯且目睹流離困苦之狀則桑梓之愛自有不容不言而言亦不容不詳且切也異日者仁人君子或不遺葛藟因而援手松民倒懸余又何惜出位之罪哉